

2026. URTEAN BAZTANGO ELKARTEEK SUSTATUTAKO KULTUR JARDUERETARAKO DIRULAGUNTZEN DEIALDI PUBLIKOAREN OINARRI ARAUTZAILEAK

Baztango Udalak, kultura-elkarteen eta arte-erakundeen jarduerak babesteko asmoz, norgehiagoka bidezko dirulaguntzak emateko oinarri hauek onartu ditu.

Deialdi honetarako diru-kopurua, gehienez ere, **22.000 eurokoa da, 2026. urteko aurrekontuan dagoen 1-3340- 4890000 “Kultur elkarteen diru-laguntzak” kontu-sailean jaso.** 1-3269-4890001 aurrekontu-zuzkidura osoa agortzen ez bada, Baztango Udalak 1-3340 4890000 kontu sailera zuzenduko du.

1. Xedea

Ondoko ezaugarriak dituzten **kultur jarduerak** antolatzeko dirulaguntza ematea:

- a) Euskararen erabilerari laguntzen diotenak izatea.
- b) Formakuntzak (ikastaroak, lantegiak, hitzaldiak...) izatea.
- c) Sormen lanak (erakusketak...) izatea.
- d) Artistikoak (antzezlanak, bideo emanaldiak, kontzertuak...) edo antzeko izaera duten bertze batzuk izatea.
- e) Herritar guziendako irekiak izatea.
- f) Genero-berdintasuna edota emakumeen aurkako indarkeriaren prebentzioa sustatzea.

Deialdi honetatik kanpo geldituko dira ondoko jarduerak:

- a) Hezkuntza programetan aurreikusitako edo horiei lotutako irakaskuntza-jarduerak.
- b) Kirol-jarduerak.
- c) Herriko bestetakoak eta laguntza jarduerak.
- d) Udalerritik kanpo egiten direnak.
- e) Nafarroako Gobernuak edo bertze erakunde batzuek diruz erabat lagunduek.
- f) Egoitza edo lokalak egokitze lanak edo hirigintza arloko bertze edozein lan.
- g) Funtzionamendu gastuak (alokairua, telefonoa, argia, langileen nominak...); mantenu gastuak (bazkariak, afariak, etab), kilometrajea eta musika taldeek sortutako gastuak (orkestrak).
- h) Ezaugarri sexistak, arrazistak, edo indarkeriakoak barne hartzen dituzten jarduerak.
- i) Udal eskaintzarekin lehiatuko diren jarduerak.
- j) Elkarteek beste erakunde batzuei diruz laguntzen dizkieten jardueren gastuak.
- k) Sukaldaritza- eta gastronomia-ikastaroak.
- l) Erraldoi eta buruhandien erosketak.
- m) Obra birsortzeko ez den bertze erabilera bat izan dezaketen jantziak, edo merkataritza-sustapeneko ar-tikuluak izan daitezkeenak.

Hauek izanen dira diruz lagunduko direnak:

- a) Antolakuntza. Kultur proiektua egiteak eta garatzeak zuzenean eragiten dituen gastuek baino ez dute dirulaguntza jasoko. Ez dira onartuko diruz laguntzeko gastu bezala, ez osorik ezta zati batean ere, erakunde eskatzailearen egitura kudeatzeak eragindako gastuak (langileen gastuak, lokalak mantentzeko gastuak, egitura funtzionala mantentzeko gastuak, alokairuak...).

2. Onuradunaren betebeharrak

Dirulaguntza hauen onuradunek ondoko betebeharrak dituzte:

- 2.1. Irabazi asmorik gabeko elkarteak izatea. Elkartearen estatutuak auzatu behar dira. Baztango Udalak agiri horiek jada bere eskutetan baditu, nahikoa izanen da agiri horiek aldatu ez direla adierazten duen legezko ordezkariaren aitortzea, agiri horiek ez direla aldatu. (III eranskina ikusi)
- 2.2. Zerga egoitza eta helbide soziala Baztanen izatea.
- 2.3. Zerga eta Gizarte Segurantzako ordainketak eguneratuta izatea eta Baztango Udalarekin zorrik ez izatea.
- 2.4. Onuradunek baldintzak betetzen dituztela egiaztatzen duten agiriak aurkeztu beharko dituzte.

Honako hauek ezin izanen dute parte hartu eta ez dute parte hartuko deialdi honetan:

- Pertsona fisiko edo juridikoak, baldin eta beren asmo edo helburuak, onartzeko edo sartzeko sistema, funtzionamendua, ibilbidea, jarduna, antolaketa edo estatutuak emakumeen eta gizonen berdintasun-printzipioaren aurkakoak badira.

- Pertsona fisiko eta juridikoak, baldin eta berdintasunerako eta sexuagatiko bereizkeriarik ezarako eskubidea urratzeagatik, soldata-bereizkeriagatik, sexu-jazarpenagatik edo jazarpen moral edo sexuagatiko beste edozein tratu desberdinengatik administrazio-bidean, lan-bidean edo bide penalean irmo zehatuak edo kondenatuak izan badira.

- Genero-berdintasunari buruzko legerian ezarritako betebeharrak betetzen ez dituzten erakundeak edo enpresak. Sexuagatik edo generoagatik diskriminatzailetzat jotako lan-praktikak egiteagatik edo onartzeagatik administrazio-ebazpen irmoz edo epai judizial irmoz zigortutako edo kondenatutako erakundeak. Horretarako, laguntzak eskatzeko unean, enpresa eta erakunde eskatzaileek erantzukizunpeko adierazpen bat aurkeztuko dute, administrazio-zehapen irmorik eta epai kondenatzaile irmorik betetzen ari ez direla adierazteko, edo, hala badagokio, arrazoi horiengatik ezarritako zehapen edo kondena-epai bat betetzeko zain ez dardela adierazteko.

- Ezin izanen dira onuradun izan dirulaguntzei buruzko azaroaren 17ko 38/2003 Lege Orokorren 13. artikuluko 2. eta 3. paragrafoetan ezarritako egoeraren batean dauden erakundeak. III. eranskinean jasotakoaren arabera (4. baldintza).

3. Deialdia eta izapidea

Eskabideak behar bezala beterik telematikoki aurkeztu beharko dira, Baztango Udalaren erregistro elektronikoaren bidez [Sede Electrónica - BAZTAN](#) edo edozein erregistro ofizialen bidez, elkartearen legezko ordezkariak duen pertsonak.

Eskaerak aurkezteko epea 2026ko azaroaren 6a arte izanen da, egun hori barne.

Deialdian aurkezteak oinarri hauek onartzea dakar eta eskabideak emandako ereduaren arabera bete beharko dira (I. Eranskina). Jarduerak 2025eko azaroaren 8tik 2026ko azaroaren 6ra bitartean egingen dira, biak barne.

Dirulaguntzak emateko prozedura antolatzeke eta bideratzeko organo eskuduna Alkatetza edo honek ahalmen hori eskuordetzan ematen dion organoa izanen da.

Balorazioa. Eskabideen ebazpen-proposamena egiteko eskumena izanen duen balorazio-batzordea honako hauek osatuko dute: kultura zinegotziak, kultura teknikariak eta talde politiko bakoitzak izendatutako zinegotzi batek.

Era berean, balorazio-batzordeak haren kide ez diren teknikarien aholkularitza eskatu ahal izanen du.

4. Dirulaguntza ematea

Emanen den gehienezko zenbatekoa ez da diruz laguntzen ahal diren eta onartu diren gastuen % 75 baino gehiago izanen.

Dena dela, dirulaguntzen onuradunek ezin izanen dute 6.000 € baino gehiago jaso deialdi bakoitzeko.

Baztango Udalak, kasu zehatz bakoitza kontuan hartuta, egokitzen jotzen duen bertze edozein dokumentazio osagarri eskatu ahal izanen dio eskatzaileari, aurkeztutako eskaeraren balorazioa egiteko.

Errekerimenduak posta elektronikoz egingen dira, eskaera- inprimakian jasotako helbidera zuzenduta.

Dirulaguntza eman baino lehenago, behar izanez gero, batzordeak eskatzaileari deitu ahal izanen dio honek behar dituen azalpenak eman ditzan.

Udalak onartutako dirulaguntza ordainketa bakarrean emanen du, gastuak justifikatu ondoren: burututako jardueraren oroitidazkia edo memoria (II. Eranskina), jarduera egiteko erabili diren bertze dirulaguntzen edo bertzelako diru-sarreraren gaineko erantzukizun-aitorpena.

Gastuen justifikazioa aurkezteko epea 2026ko azaroaren 6ra arte izanen da, egun hori barne.

Onartutako gastuen % 100 justifikatuko da, ez Baztango Udalak emandako dirulaguntza kopurua bakarrik. Gastuak kultur elkartearen izenean dauden jatorrizko fakturen bidez justifikatuko dira; horiek, behin egiaztatu eta zigilatu ondoren, dirulaguntzaren eskatzaileari bueltatuko zaizkio. Faktura horietan bilduko dira legeek eskatzen dituzten datu guztiak eta baita jarduera edo zerbitzuaren deskripzio zehatza ere. Hartu- agiriak bertze modu batez egiaztatu ezin diren gastuen kasuan bakarrik onartuko dira, eta, edonola ere, hartu-agiria sinatzen duen pertsona ezin izanen da enpresaria edo profesionala izan; hala balitz, faktura egin eta ematera behartuta bailegoke. Hartu-agiriak datu hauek bildu behar ditu: jaulkitzailearen eta jasotzailearen izen-abizenak, IFZa eta helbidea; ekintza edo zerbitzuaren deskripzio zehatza; prezio osoa, eta tokia, data eta jasotzailearen sinadura.

Ordainagiriekin eta fakturekin batera, banku-ordainagiriak aurkeztu beharko dira.

Ematen den dirulaguntza bateraezina izanen da Baztango Udaleko bertze dirulaguntzekin, eta bateragarria izanen da bertze administrazio publiko batzuek, erakunde publiko edo pribatuek eta norbanakoek, naziokoek zein atzerrikoek, ematen dituzten bertzelako dirulaguntzekin. Haien zenbatekoak, bakarrik edo denak baturik, ezin izanen du behin ere egin beharreko jardueraren kostua gainditu. Diru-sarreraren eta gastuen justifikazioa aztertutakoan, diru-sarrerak gastuak baino handiagoak direla ikusten bada, Baztango Udalak emandako dirulaguntzari gehiegizko diru-sarreraren zenbatekoa kenduko dio.

Ekitaldi batean dirulaguntza jasotzeak ez du ondoko deialdietan dirulaguntza jasotzeko inolako eskubiderik suposatuko.

5. Irizpideak

Kultur jarduerak antolatzeko oinarrian ezarritakoaren arabera eskatutako laguntzetan, honako hau baloratuko da:

- Jarduera tokiko kulturari lotua izatea lehenetsiko da. % 10.

- Euskararen erabilera eta sustapena bultzatzea. % 10.
- Herritarren parte hartzea baloratuko da. Borondatezko lana kontuan hartuko da. % 10.
- Jarduera erakunde eskatzaileak berak eta haren kideek antolatua eta burutua izatea. % 30.
- Baztanen egoitza soziala duten erakunde desberdinen arteko elkarlana baloratuko da. % 10. Entitate batek antolatzaile gisa agertu behar du, eta gainerakoak parte hartzaile gisa. Elkarre antolatzaileak jarduerari dagokion dirulaguntza jasoko du. Laguntzaren eskabidean, entitate bakoitzak bere gain hartzen dituen konpromisoak adierazi behar ditu, baita haietako bakoitzagatik aplikatuko duen dirulaguntzaren zenbatekoa ere. (IV. Eranskina)
- Elizondotik kanpo egiten diren ekitaldiak, Baztango gainerako herrietan egiten direnak alegia, baloratuko dira. %10.

6. Udalaren betebeharrak

Diruz lagundutako jarduerak agendan sartzea, betiere antolatzaileek epearen barnean horren berri ematen badute. Udalak bere materialak, baliabideak eta lokalak laga beharko ditu.

7. Onuradunaren betebeharrak

Dirulaguntzak jasotzen dituztenek honako betebeharrak izan behar dituzte:

- Dirulaguntzen onuradunek jasotako laguntza zehaztutako xedeetarako erabili behar dute eta hala izan dela agirien bidez ziurtatu.
- Onuradunek behin proiektua akituz gero, jardueraren oroitidazkia edo memoria (II eranskina), diruz lagundutako jardueraren erabiltzaileen edo onuradunen eta proiektua edo jarduera gauzatzeko atxikitako langile kontratatuen edo boluntarioen datuak sexuaren arabera bereizita, balantze ekonomikoa (gastuak eta diru-sarrerak) eta jarduera egiterakoan izandako gastuen frogagiriak (jatorrizkoak edo fotokopia konpultsatutakoak) aurkeztu beharko dituzte, 2026ko azaroaren 6a baino lehen.
- Onuradunek diruz lagun daitezkeen jarduerak finantzatzen dituzten beste dirulaguntza, laguntza, diru-sarrera edo baliabide batzuk lortzen badituzte, zenbatekoak Baztango Udalari jakinarazi beharko dizkiote.
- Onuradunek indarrean dagoen araudia bete beharko dute, batez ere Baztango Udal esparruan euskararen erabilera eta sustapena arautzen dituen ordenantza. Baita 36/2024 Foru dekretua, apirilaren 17koa, ekitaldi publikoei eta jasagarritasunari buruzkoa 2024ko 91 Nafarroako Aldizkari ofiziala, maiatzaren 3koa eta 17/2019 Foru Legea, apirilaren 4koa, Emakumeen eta Gizonen arteko berdintasunarena
- Onuradunek dirulaguntza jaso duten jardueren publizitate eta hedapenerako Baztango Udalaren ikurra erabili beharko dute.
- Onuradunek programaren garapenean gertatzen den edozein gorabehera, gertatzen den unean berean jakinarazi beharko diote Baztango Udalari.
- Proiektua edo jarduera gauzatzean sortzen diren agiri, publizitate, irudi edo material guztietan, hizkuntzaren eta irudien erabilera inklusiboa eta ez-sexista erabili beharko da, emakumeen diskriminazioa edo estereotipo sexistak eragiten dituen edozein irudi saihestu beharko dira, eta berdintasunaren, presentzia orekatuaren, aniztasunaren, erantzunkidetasunaren eta genero-rol eta -identitateen aniztasunaren balioak dituen irudiak sustatu, salbu eta, laguntzaren izaeragatik, justifikatuta bada ez sartzea. Horretarako, onuradunek, "*Guía sobre estrategias de comunicación incluyente: El Género como prioridad*" gida kontsulta dezakete, helbide honetan eskuragarri dagoena: <https://labur.eus/guiadecomunicacion>

Oinarrietan aurreikusitako betebeharren bat betetzen ez bada, laguntza osorik edo hein batean baliogabetuko da eta, hala badagokio, itzuli egingen da.

8. Dirulaguntzaren itzulketa

Dirulaguntzak emateko ebazpena baliorik gabe utziko da eta jasotako diru-kopuruak itzuli beharko dira dirulaguntzei buruzko azaroaren 17ko 38/2003 Lege Orokorren II. tituluko I. eta II. kapituluetan araututako kasuetan eta ezarritako moduan.

9. Arau-hauste eta zehapen administratiboak

Dirulaguntzen eta laguntza publikoen arloko arau-hausteak eta zehapenak Diru-laguntzei buruzko azaroaren 17ko 38/2003 Lege Orokorrean ezarritakoaren arabera arautuko dira.

10. Errekurtsoak

Deialdiak agiri honek bildutako baldintzei jarraituko die; agiriak ez bildutakoari dagokionez, ondoko arauei jarraituko die: Nafarroako Tokiko Administrazioaren Foru Legea, Nafarroako Tokiko Ogasunen Foru Legea, Nafarroako Ogasun Publikoaren Foru Legea eta, osagarri gisa, Aurrekontuen gaineko Lege Orokorra, estatu mailan dirulaguntzak arautzen dituen.

Oinarri hauen aurka eta haiek betearazteko hartzen diren administrazio egintzen aurka errekurtso hauetako edozein aurkeztu ahalko da:

- Jakinarazi eta hurrengo hilabetean, nahi izanez gero, berraztertze errekurtsoa, erabakia hartu duen udal organoari zuzendua (39/2015 Legea, urriaren 1ekoa, Administrazio Publikoen Administrazio Prozedura Erkidearena). Berraztertze errekurtsoa aurkeztu bada, ezin da ez goiti jotzekorik ez administrazioarekikorik aurkeztu, harik eta lehenbizikoa ebatzi edo atzera botatzen den arte. Berraztertze errekurtsoaren ebazpenaren kontra ezin izanen da errekurtso hori bera berriz aurkeztu.
- Hilabeteko epean, jakinarazpena egin eta biharamunetik hasita, gora jotzeko errekurtsoa aurkeztu daiteke, Nafarroako Administrazio Auzitegiari zuzendua (uztailaren 2ko 6/1990 Foru Legea). Errekurtso hori aurkeztu bada, ezin izanen da administrazioarekiko auzi-errekurtsorik aurkeztu, harik eta gora jotzeko errekurtsoa ebatzi edo atzera botatzen den arte.
- Bi hilabeteko epean, jakinarazi eta biharamunetik hasita, administrazioarekiko auzi-errekurtsoa, jurisdikzio horretako organo eskudunari zuzendua (uztailaren 13ko 29/1998 Legea).

11. Legedi aplikagarria.

Dirulaguntza hauek, oinarri hauetaz gain, Baztango Udalaren kasuan kasuko ekitaldiko aurrekontua betearazteko oinarriak arautzen dituzte, baita ondoko legeek ere: 17/2019 Foru Legea, apirilaren 4koa, Toki-Administrazioaren gainekoa; 38/2003 Legea, azaroaren 17koa, dirulaguntzei buruzkoa; uztailaren 21eko 887/2006 Errege Dekretua, Dirulaguntzei buruzko azaroaren 17ko 38/2003 Lege Orokorren Erregelamendua onesten duena, eta horiekin bat datorren gainerako legeria.

- I Eranskina (Eskabidea)
- II Eranskina (Memoria)
- III Eranskina (Erantzukizunpeko adierazpena)
- IV Eranskina (Elkarteen arteko akordioa)